

## غناہواں تُوں توبہ ناں کرنے نا نتیجہ

# 13

<sup>1</sup> اُس ویلے لوکاں وچوں کجھ بندیاں حضرت عیسیٰ کی ریاست گلیل نے اُنہاں لوکاں نے بارے وچ دسیا جنہاں کی رومی گورنر پیلاطس اُس ویلے قتل کروایا سی جیہڑے ویلے او بڑے عبادت خانے وچ قربانیاں دیٹھے پئے سن۔ <sup>2</sup> حضرت عیسیٰ اُنہاں لوکاں کی آخیا، ”تساں گے سمجھٹے او کہ اے گیلیلی جیہڑے اسرح مارے گئے سن، دُوئے لوکاں نی بہ نسبت زیادہ غنہگار سن؟ <sup>3</sup> ناں ناں! بلکہ میں تساں کی دسی شوڑاں، اگر تساں اپٹے غناہواں تُوں توبہ ناں کیتی، تے اُنہاں نی طرح تساں سارے وی ہلاک ہوئی جاسو۔ <sup>4</sup> یا فر او اٹھاراں بندے جنہاں اپر مینارِ شلوخ ٹھٹھا سی تے او اُس تھلے دبی کے مری گئے سن، یروشلم شہر نے باقی سارے لوکاں کولوں زیادہ غنہگار سن؟ <sup>5</sup> بلکل ناں! بلکہ میں تساں کی دسی شوڑاں، اگر تساں اپٹے غناہواں تُوں توبہ ناں کیتی، تے تساں وی اُنہاں نی طرح ہلاک ہوئی جاسو۔“

## نال پھلٹے آلے بوٹے نی مثال

6 فر حضرت عیسیٰ اُنہاں کی اے مثال دتی، ”کُسے بندے نے انگور نے باغے وچ انجیر ناک بوٹا لگا سی۔ او بوٹے کول اے تکتے واسطے گیا کہ اس نال پھل لگا اے کہ نی۔ پر اُس نال کُجھ وی نی سی لگا۔ 7 تے فر اُس مالی کی آخیا، ’یرا تکیں نال، ترے سال ہوئی گئے ان اِس بوٹے نال کُجھ پھل نی لگا۔ تون اسرح کر کہ اسی کپی شوڑ۔ اِس خواہ مخواہ جغہ کہیری وی اے۔‘ 8 مالی جواب دتا، ’صاحب جی، اِس سال رہن دیو۔ میں اِس نی گوڈی گرساں، تے ہیل باساں۔ 9 اگلے سال پھل لگا تے ٹھیک۔ اگر فر وی نال پھلیا تے کپی شوڑیائے۔‘

## حضرت عیسیٰ اک کُبی عورت کی شفاء دینے ان

10 فر اسرح ہویا کہ اک واری ہفتے آلے مبارک دیہاڑے حضرت عیسیٰ کُسے عبادت خانے وچ وعظ دینے پئے سن۔ 11 اُتھے اک ایٹھے جہی عورت سی جسی اٹھاراں سالان تون جنے پغڑے آسی۔ او اتنی کُبی ہوئی گئی سی

کہ او بلکل سِدھی نی ہوئی سکتی سی۔<sup>12</sup> حضرت عیسیٰ اُس کی تکیا تے کول بُلائی کے آخیا، ”ماسی، تُساں نی جان اِس بیماری تُوں چھڑکی گئی اے!“<sup>13</sup> فِر اُنہاں اُس اُپر اِپنے دَسِتِ مُبارک رُخے تے اُس نی کِنڈ اُسے ویلے سِدھی تیر ہوئی گئی۔ فِر اُس عورت اللہ تعالیٰ نی تعریف کیتی۔

<sup>14</sup> اے گل تکی کے عِبادت خانے نا سربراہ خفا ہویا کہ ہفتے آلے مُبارک دیہاڑے اُنہاں اے گم کیئاں کیتا۔ او لوکاں کی آخٹ لغے، ”گم کرنے نے چھے دیہاڑے ہوئے اِن، ہفتے آلا مُبارک دیہاڑا نی ہوئا۔ جس کُسے کی شفاء نی لوڑ ہووے، اُنہاں دیہاڑیاں وچ اچھیا کرو۔“

<sup>15</sup> حضرت عیسیٰ اُس کی آخیا، ”او مُناقفو! تُساں وچ کوئی بندہ اے وے، جیہڑا اِپنے داندے یا کھوتے کی ہفتے آلے مُبارک دیہاڑے کِلے تُوں کھولی کے پائی پیالٹے واسطے نی گھڑنا؟“<sup>16</sup> اے عورت حضرت ابراہیم نی نسل وچوں اے، تے اٹھاراں سالان تُوں شیطان نے قبضے وچ ہوئی وی اے۔ کیئاں اے گل ٹھیک نی کہ ہفتے آلے مُبارک دیہاڑے اِس کی رہائی لبھی جائے؟“

17 حضرت عیسیٰ نے اس جواب توں مُخالفت کرنے  
 آلے لوک شرمندہ ہوئی گئے، تے باقی سارے لوک اُنہاں  
 نے بابرکت کماں کی تکی کے بہوں خوش سن۔

### رائی نے دائے نی مثال

18 فر حضرت عیسیٰ آخیا، ”اللہ تعالیٰ نی بادشاہی کِسرَح  
 ہوئی اے؟ میں اُس نی مثال کے دیاں؟<sup>19</sup> اس کی تُساں  
 اِسرَح سمجھی کہنو کہ اک رائی نا داٹا، جسی کُسرے  
 بندے اپٹے باغے وچ لایا۔ او اُگی کے بڑا ہویا تے اک بڑا بُوٹا  
 بٹی گیا تے پرندیاں آئی کے اُس اپر اُلٹے بنائی کہندے۔“

### خمیر نی مثال

20 فر اُنہاں آخیا، ”میں اللہ تعالیٰ نی بادشاہی نی  
 مثال ہور کِسرَح دیاں؟<sup>21</sup> اِسرَح سمجھو کہ او خمیر  
 نی طرح اے جسی کوئی جناٹی بہوں سارے اُٹے  
 وچ باہٹی اے، تے سارا اُٹا خمیرا ہوئی جاٹا اے۔“

## سوڑے دروازے نی مثال

22 حضرت عیسیٰ یروشلم شہر در جائے ویلے  
شہر شہر تے گرائیں گرائیں وچ وعظ دیٹے گئے۔  
23 کُسے بندے انہاں کولوں پُچھیا، ”حضور،  
صرف تھوڑے لوکاں کی نجات لبھسی؟“  
انہاں فرمایا، 24 ”تنگ دروازے وچوں لنگھتے نی پوری  
کوشش کرو، کیئانکہ بھوں سارے لوک کوشش تے کرسٹ  
پر کامیاب ناں ہوسن۔ 25 او ویلا اچھسی کہ کہرے نا  
مالک اٹھی کے دروازہ بند کری شوڑسی۔ فرٹساں باہر  
کھلی کے آخترے رسو، ’سرکار! آساں کی اندر اچھن دیو۔‘  
پر او جواب دیسی، ’ٹساں کُن ہو؟ پتہ نی کتھوں آئی گئے  
او!‘ 26 اُس ویلے ٹساں آخسو، ’آساں ٹساں نال کھائے پیٹے  
رہے آں۔ ٹساں آساں نے شہر وچ وعظ کرنے رہے او۔‘ 27 پر  
او فرٹساں کی آخسی، ’ٹساں کُن ہو؟ پتہ نی کتھوں آئی  
گئے او! ٹساں سارے بدماشو، مہاڑے کولوں دُور جاؤ!‘  
28 اُس ویلے ٹساں روسو تے پچھتاوے نال دند پیٹے رسو  
جیہڑے ویلے ٹساں حضرت ابراہیم، حضرت اسحاق،

حضرت یعقوب تے ہور سارے نبیاں کی اللہ تعالیٰ  
 نی بادشاہی وچ رہنا تکسو تے اپنے آپ کی دھتکاریا  
 تکسو۔<sup>29</sup> لوک مشرق، مغرب، شمال تے جنوب توں  
 اچھی کے اللہ تعالیٰ نی بادشاہی وچ داخل ہوئی کے  
 دعوت کھائے واسطے بیہسٹ۔<sup>30</sup> کجھ ایئے جہے  
 ہوسٹ جیہڑے آخر اپر اچھسٹ پر انہاں کی اچا درجہ  
 لبھسی، تے کجھ ایئے جہے ہوسٹ جیہڑے پہلے  
 نے آئے وے ان پر انہاں کی کمتر درجہ لبھسی۔“

### حضرت عیسیٰ نی یروشلم شہر نال محبت

<sup>31</sup> فر اسرح ہویا کہ فریسی فرقے نے کجھ لوکاں  
 اچھی کے حضرت عیسیٰ کی آخیا، ”تساں  
 اتھوں نکلی کے کڈرے تری جاؤ، کیئانکہ  
 بیرودیس بادشاہ تساں کی مرواٹا چاہٹا آے۔“  
<sup>32</sup> حضرت عیسیٰ انہاں کی آخیا، ”جائی کے اُس  
 لومڑے کی دسو کہ، ’آج تے گل میں جنات کی  
 کڈھنے نا کم تے بیماراں کی شفاء دیئے نا کم گرساں،

تے تریئے دیہاڑے مہاڑا گم ختم ہوئی جاسی۔<sup>33</sup> پر  
 اے گل ضروری اے کہ آج، گل تے پرسوں میں  
 اپنا سفر جاری رِخاں، کیئانکہ نبی اگر شہید ہوٹا  
 ہی اے وے تے یروشلم شہر وچ ہی شہید ہووے!“  
<sup>34</sup> فر حضرت عیسیٰ آخیا، ”یروشلم نے لوکو! تُساں  
 نبیاں کی شہید کرنے تے پیغمبراں کی بٹیاں نال ماری  
 شوڑنے او۔ میں بہوں کوشش کیتی اے کہ تُساں کی  
 اسرح بچائی کہناں جسرح اک ککڑی اپٹے بچیاں کی  
 اپٹے پراں تھلے دیئی کے بچائی اے۔ پر تُساں مکی  
 اے نی کرن دتا۔<sup>35</sup> یاد رِخو! اللہ تعالیٰ تُساں نے شہر  
 کی ویران کری شوڑسی۔ اُس ویلے تک میں واپس ناں  
 اچھساں جدوں تک تُساں آپوں اے گل ناں آخسو،  
 ’مبارک اے او جیہڑا رب نے ناں اپر اچھٹا اے!‘“

نور-ے-کشمیر



اللہ تعالیٰ اپنا فضل ترے امن پاک نبیاں نے ذریعے انسانیت پر ظاہر  
کیتا۔ اسان نا دلی مقصد اے کہ اس پیغام کی پھیلا یا جائے۔  
اسان خوشی نال عیسیٰ المسیح نے بارے وچ تُساں نال گل  
کرساں، یا تُساں نال دُعا کرساں، یا تُساں نی مدد کرساں۔



<https://m.me/noor3kashmir> WhatsApp +447726104324 <https://noorekashmir.com>